

**PORUKE** Šta pokazuje Bajdenova posjeta

# Posao SAD u BiH nije završen

Posjeta američkog potpredsjednika potvrda je da u Vašingtonu postoji sve veća zabrinutost za BiH, smatra Basiner • Tihić očekuje važnu poruku

Posjeta američkog potpredsjednika Džozefa Bajdena (Joseph Biden) BiH sredinom ovog mjeseca ima ogroman politički značaj za cijeli region i imat će značajne posljedice, cijene u izjavama za „Dnevni avaz“ analitičari i političari komentirajući najavu o Bajdenovom dolasku u BiH, Srbiju i na Kosovo. Pripreme za njegovu posjetu već su u toku, nakon što je Bijela kuća zvanično potvrdila njegov dolazak.

## Pravi trenutak

Kurt Basiner (Bassuener), politički analitičar iz Centra za demokratizaciju, naglašava da je Bajdenova posjeta potvrda da u Vašingtonu postoji „sve veća zabrinutost zbog načina na koji se odvijaju stvari u BiH“.

- Treba imati u vidu da je ovo tek drugi dolazak potpredsjednika SAD na evropsko tlo od inauguracije i već sada on dolazi u ovaj region. Njome će Bajden pokazati da za SAD posao u BiH nije završen te da međunarodna zajednica mora ostati posvećena i jedinstvena i nakon odlaska OHR-a. Time se pokazuje i Briselu da mora imati aktivniju ulogu - kaže Basiner.



Bajden: Dolazak od ogromnog značaja

Prema njegovim riječima, imenovanje specijalnog predstavnika SAD za ovaj region jedini je način da se ujedine napori međunarodne zajednice u stabilizaciji prilika u BiH.

- Bajdenova posjeta dolazi u pravom trenutku, pred sljedeću sjednicu Vijeća za implementaciju mira (PIC) i imat će sigurno krupan utjecaj na cijeli region - kaže Basiner.

Lider SDA Sulejman Tihić navodi da je Bajdenova posjeta „u duhu očekivanja“ i većeg interesiranja SAD za BiH.

- Ovo je vrlo korisna posjeta na najvišem nivou. Bajdenova posjeta sigurno nije protokolarna, već će doći da prenese važan stav i poruku. Vidjet ćemo hoće li to donijeti i neke konkretnije

## Lobiranja za susret

Detalji i program Bajdenove posjete još nisu otkriveni javnosti. Od kada je zvanično potvrđena informacija da Bajden dolazi u BiH, počela su, kako saznajemo, snažna lobiranja svih važnijih političkih opcija da se „uguraju“ u program njegove posjete.

Analitičar Basiner ističe kako se može očekivati da će svaka politička opcija ovu posjetu pokušati iskoristiti za svoje ciljeve.

- Svi, i Milorad Dodik i Haris Silajdžić, to će pokušati okrenuti u svoju korist - smatra Basiner.

odgovore na probleme za BiH - naglašava Tihić.

## Ivanić očekivao

Predsjednik PDP-a Mladen Ivanić smatra da se radi o značajnoj posjeti, ali da ona, ipak, neće imati nikakve „dramatične posljedice“ po političku situaciju u BiH.

- Kao dobar poznavalac prilika, moglo se očekivati da se Bajden pojavi u BiH. To smatram pokazateljem njegove lične zainteresiranosti. On će biti mnogo angažiraniji nego bilo koji od potpredsjednika ranije, ali ne mislim da će biti dramatičnih zaokreta u odnosu prema situaciji u BiH - kaže Ivanić.

Iz Američke ambasade u Sarajevu potvrdili su za naš list da će posjeta potpredsjednika SAD biti u sedmici koja počinje 18. maja, a da će se Bajden tokom nje u razgovoru „s političkim liderima i drugima“ upoznati s trenutnom situacijom u BiH. **T. LAZOVIĆ**

## Ingliš i Alkalaj o Bajdenovoj posjeti



Ingliš i Alkalaj: Razgovori o bilateralnim odnosima

Ministar vanjskih poslova BiH Sven Alkalaj sastao se jučer s ambasadorom Sjedinjenih Američkih Država Čarlsom Inglišom (Charles English), saopćeno je iz MVPBiH.

Alkalaj i Ingliš razgovarali su o bilateralnim odnosima BiH i SAD, s posebnim osvrtom na predstojeću posjetu američkog potpredsjednika Džozefa Bajdena (Joseph Biden) našoj zemlji te temama koje će se tom prilikom razmatrati.

## Turković: Bit će osuđena pasivnost

Donedavna ambasadorica BiH u Vašingtonu Bisera Turković cijeni da je značaj posjete američkog potpredsjednika ogroman.

- Ovaj zastoj i spavanje bh. političara ne mogu se tolerirati i

SAD očekuju njihovu mnogo odlučniju ulogu. U tom smislu očekujem da će biti osuđena pasivnost, ali i nesloga i nacionalizam koji su doprinijeli usporenom putu BiH ka EU - ocjenjuje Turković. **A. M.**

Bh. delegacija u službenoj posjeti Iranu

## Zamjerka zbog dobrih ekonomskih veza s Izraelom

Delegacija Parlamentarne skupštine BiH, u kojoj su Beriz Belkić, Ilija Filipović i Lazar Prodanović, jučer se tokom službene posjete Iranu susrela s predsjednikom tamošnjeg parlamenta Alilom Ardeshirom Laridžanijem.

Prodanović, inače poslanik SNSD-a u Predstavničkom domu Parlamenta BiH, za „Dnevni avaz“ izjavio je da je za vrijeme

susreta predstavnika dvije zemlje ocijenjeno da su politički odnosi BiH i Irana izuzetno dobri, ali da je ekonomska saradnja na dosta lošem nivou.

Tokom razgovora ocijenjeno je da je neophodno intenzivirati međusobne kontakte poslovnih ljudi dvije zemlje te privući u BiH veći broj iranskih privrednika.

Na novinarsko pitanje zašto

BiH ima bolje ekonomske veze s Izraelom nego s Iranom, „iako je Iran našoj zemlji pomagao tokom rata“, predsjedavajući Predstavničkog doma Državnog parlamenta Beriz Belkić odgovorio je da njegova zemlja nema izvanredne ekonomske veze ni s Izraelom, ali da ih pokušava ostvariti kako sa susjedima, tako i sa zemljama regiona“. **S. R.**



Mehmedić: Prošlo 100 dana mandata

**Ličnost dana** Besim Mehmedić

## Slatkorječivi premijer

Umjesto uspješnih estradnih političara i premijera, Kantonu Sarajevo potrebni efikasni operativci na vlasti

Odavno neki političar nije pobrao više simpatija javnosti nego Besim Mehmedić kada je prije nešto više od 100 dana izabran za premijera najvažnijeg i najvećeg kantona - Sarajevskog.

Nizom slatkorječivih obećanja i za javnost popularnih poteza ovaj diplomirani arhitekta dobio je punu podršku da Sarajevo i okolica napokon krenu ka nečemu boljem od onoga što se zove žabokrečina i stagnacija.

No, jednako kako je dobio simpatije, Mehmedić je sada u opasnosti da ih u rekordno kratkom vremenu izgubi. Stalno pravdanje da je budžet Kantona znatno smanjen nije nikakvo opravdanje.

Primjerice, dok je premijer bio Denis Zvizdić, Kanton Sarajevo imao je za 100 miliona KM manji budžet nego sada u Mehmedićevo

vrijeme. Ipak, Zvizdić je uredno izvršavao budžetske obaveze prema građanima i institucijama. Uz to je pokrenuo infrastrukturne radove i nekoliko kilometara sjeverne longitudinalne, odnosno četiri saobraćajne trake od „Mercatora“ do Željezničke stanice, završio za nekoliko mjeseci.

Istovremeno, 200-300 metara te saobraćajnice mjesecima nepotrebno čeka završetak radova.

Ni stanjem u javnom sektoru Mehmedić se ne može pohvaliti, a isprazne priče o inozemnim kreditima i novim revizijama starih projekata samo su izgovor za dosadašnju neefikasnost.

No, ako mu je prvih 100 dana mandata prošlo u svojevrsnoj estradnoj kampanji, nadati se da će Mehmedić, ipak, istinski zasukati rukave i početi konkretno nešto raditi. **M. K.**

NSRS prekršila Izborni zakon BiH

## Imenovanje Republičke izborne komisije bit će poništeno

Imenujući šest od sedam članova srpske nacionalnosti u Republičku izbornu komisiju, Narodna skupština RS prekršila je Izborni zakon BiH, saznaje „Dnevni avaz“.

Naime, sastav izborne komisije prema ovom zakonu mora biti multietničan, tako da odražava zastupljenost konstitutivnih naroda, uključujući i ostale, u izbornoj jedinici za koju je Komisija nadležna. Pri tome, Komisija bi trebala voditi računa o posljednjem popisu stanovništva iz 1991.

O ovom pitanju jučer je raspravljano i na kolegiju Centralne izborne komisije BiH. Po završetku Kolegija, predsjedavajući CIKBiH Suad Arnautović kazao nam je da će se CIK o ovome izjasniti na sjednici u četvrtak.

- Iz spisa koji mi je dostupan



Arnautović: Izjašnjavaće u četvrtak

mogu vam potvrditi tačnost informacije da je NSRS imenovala šest članova iz reda Srba i jednog iz reda Bošnjaka u ovu komisiju. Nema nijedan Hrvat, a očigledna je i disproporcija u nacionalnom sastavu na relaciji Srbi-Bošnjaci - odgovorio je Arnautović na naš upit.

Prema Izbornom zakonu BiH, ako sastav izborne komisije ne bude multietničan, tako da odražava zastupljenost konstitutivnih naroda, CIKBiH će poništiti imenovanje članova i o tome izvijestiti organ nadležan za imenovanje (NSRS).

Za članove Republičke izborne komisije, kako je navedeno na zvaničnoj web-stranici NSRS, imenovani su Gordana Čerić, Oliver Blagojević, Gordan Jovanović, Anto Nikolić, Ljubinko Mitrović, Nebojša Vidaković i Enis Tabaković. **S. ROŽAČAC**